


学海 二十一卷二



庫	文	閣	內
五	三	三	漢
函	冊	〇〇六	書
架	冊	號	類

庫	文	閣	內
三	七	三	漢
函	冊	〇〇六	書
架	冊	號	類

內閣文庫			
番號	漢	3006	
冊數	80 (9)		
函號	367	85	



學海君道篇卷之二十一

漢草文庫

世系類一

列國譜系二

大國篇二

晉世章

唐叔虞周成王母弟初封於唐



左傳子產曰當武王邑姜方震大叔夢帝謂已余命而子曰虞將

與之唐屬諸參而養育其子孫及生有文在其手曰虞遂以命之

及成王滅唐而封大叔焉故參為晉星

又左傳祝佗曰武王克殷以大路密須之鼓闕鞏姑洗懷姓九宗

職官五正命以唐誥而封於夏虛啓以夏疆以戎索



列國譜系

卷二十一

趙氏曰唐誥封唐叔之誥今亡夏虛太原也太原近戎而寒不與中國同故疆理土地用戎之法

又左傳周敬王曰唐叔成王之母弟也密須之鼓與其大路文所以大蒐也闕鞏之甲武所以克商也唐叔受之以處參虛匡有戎狄

書序曰唐叔得禾異畝同穎獻諸天子王命唐叔歸周公於東作歸禾

漢孔氏曰唐叔食邑內得異禾異畝同穎天下和同之象周公德之所致公東征未還故命唐叔以禾歸周公唐叔後封晉

卮言曰書序唐叔得禾歸禾嘉禾二篇在微子之命之後康誥之前先儒疑姪不先叔封故以封康叔爲武王之事按孔氏書

序以康叔唐叔爲食邑內而後封國則唐叔得禾在未封之時也然左傳史記皆云成王滅唐以封叔虞是唐叔初封卽有唐矣豈武王夢天與之唐遂命爲唐叔而成王滅唐以應之耶史記云成王與叔虞有桐葉之戲周公因而遂成之柳宗元作論以辨其妄其事之有無誠不可知合經傳考之必幼時事也唐叔旣幼安能就封周公豈據以大國授之母亦如後世皇子勝衣趨拜皆受封冊至旣冠以後而後之國乎然唐叔亦何從得異禾疑書序唐字亦康之訛

史記晉世家曰唐叔虞者周武王子而成王弟初武王與叔虞母會時夢天謂武王曰余命女生子名虞余與之唐及生子文在其手曰虞故遂因命之曰虞武王崩成王立唐有亂周公誅滅唐成

王與叔虞戲削桐葉爲珪以與叔虞曰以此封若史佚因請擇曰
立叔虞成王曰吾與之戲耳史佚曰天子無戲言言則史書之禮
成之樂歌之於是遂封叔虞於唐唐在河汾之東方百里故曰唐
叔虞姓姬氏字子干

索隱曰唐叔以夢及手文而名曰虞至成王誅唐之後因戲
桐而封之叔字也故曰唐叔虞而唐有晉水主子變改其國號
曰晉侯然晉初封於唐故稱晉唐叔虞也且唐本堯後封在夏
虛而都於鄂鄂今在大夏是也

正義曰括地志云故唐城在絳州翼城縣西二十里卽堯裔子
所封春秋云夏孔甲時有堯苗裔劉累遷於魯縣夏后別封劉
累之孫於大夏之虛爲侯至周成王時唐人作亂成王滅之而
封大叔更遷唐人於杜又括地志云故鄂城在慈州昌寧縣東
二里按與絳州夏縣相近宋都安邑故城在縣東北十五里故
云在大夏也然封於河汾二水之東方百里正合在晉州平陽
縣不合在鄂未詳也

羅氏路史曰叔虞居鄂鄂今大夏故云唐本堯封也後曰晉以
水名今并之陽曲故平晉西南十六有叔虞祠墓故詩止曰唐
竹書紀年成王八年^{甲辰}王命唐叔虞爲侯

晉侯燮唐叔子改國號曰晉

史記唐叔子燮是爲晉侯

正義曰括地志云故唐城在并州晉陽縣北二里城記云堯築
也國都城記云唐叔虞之子燮徙居晉水傍今并治故唐城

唐者卽燮父所徙之處其城南半入州城中削爲坊城墻北半

見在毛詩譜云叔虞子燮父以堯虛南有晉水改曰晉侯

竹書康王九年壬午唐遷於晉作宮而美王使人讓之

武侯寧族索隱曰世本作曼期譙周作曼旗也晉侯子

成侯服人武侯子

厲侯福世本作輻成侯子

靖侯宜曰厲侯子史表靖侯十八年共和元年庚申卒

史記曰自唐叔至靖侯五世無其年數靖侯以來年紀可推靖侯

十七年周厲王暴虐國人作亂厲王奔彘十八年靖侯卒

僖侯司徒靖侯子在位十四年周宣王初立十八年卒

獻侯籍世本及譙周皆作蘇僖侯子在位十一年

紀年宣王十六年巳丑晉遷於絳

穆侯費王鄒誕本作弗生或作費王竝音秘在位二十七年

竹書宣王三十八年辛亥王師及晉穆侯伐條戎奔戎王師敗逋三

十九年王師伐姜戎戰於千畝王師敗逋四十年晉人敗北戎於

汾隰四十三年晉穆侯費生薨

左傳晉穆侯之夫人姜氏以條之役生太子命之曰仇其弟以千

畝之戰生命之曰成師師服曰異哉君之名子也夫名以制義義

以出禮禮以體政政以正民是以政成而民聽易則生亂嘉耦曰

仇古之命也今君命太子曰仇弟曰成師始兆亂矣兄其替乎史

記穆侯四年取齊女姜氏爲夫人七年伐條生仇十年伐千畝有

功生成師餘同上

孔氏曰穆侯命名未必先生此意但寵愛少子於時已著師叔服知桓叔將盛故因名以諷諫欲使強幹弱枝耳

金氏曰按師服初意蓋防奪嫡之漸耳仇即文侯異日受平王秬鬯圭瓚之命兄固未遽替也其後曲沃之封在昭侯之世師服之言防微慮漸始切事實而曲沃終至奪宗故後人服其先見併記其初命名之言云

殤叔穆侯弟

史記穆侯卒弟殤叔自立太子仇出奔殤叔三年周宣王崩四年穆侯太子率其徒襲殤叔而立是為文侯

竹書宣王四十三年丙辰晉穆侯薨弟殤叔自立子仇出奔幽王元年庚申晉侯子仇歸於晉殺殤叔晉人立仇是為文侯

文侯仇穆侯世子

史記文侯十年周幽王無道犬戎殺幽王周東徙

竹書幽王二年辛酉晉文侯同王子多父鄭桓公伐郟克之平王元年辛未王東徙洛邑錫文侯命晉侯會衛侯鄭伯秦伯以師從王入於

成周

周平王錫文侯命

書傳曰文侯仇唐叔九世孫也周幽王為犬戎所殺平王立而東遷洛邑文侯與鄭武公迎送安定之平王命為侯伯伯長也諸侯之

長謂之伯平王東遷晉鄭夾

書文侯之命王若曰父義和文侯字也同姓故稱曰父不稱名故稱其字丕顯文武克慎明德亦惟先正克左右昭事厥辟越小大謀猷罔不率從肆先

祖懷在位言君聖臣良天不從其化嗚呼閔予小子嗣造天丕愆

即我御事罔或者壽俊在厥服予則罔克父死國破遇此大禍治事之臣無有者俊自恨

已弱不能致之曰父義和汝克紹乃顯祖此謂唐叔汝肇刑文武功用會紹乃辟

追孝於前文人汝多修扞我於艱若汝予嘉文侯之功在於誅犬戎立平王所以嘉之

其歸視爾師寧爾邦簡恤爾都用成爾顯德賚爾彤弓彤矢百盧

弓一盧矢百

竹書平王二年壬申賜秦晉以邠岐之田十四年甲申晉人滅韓二十

一年辛卯晉文侯殺王子余臣於攜二十五年乙未晉文侯薨

昭侯伯文侯子昭侯元年封文侯弟成師於曲沃七年潘父殺昭侯

左傳晉始亂故封桓叔於曲沃靖侯之孫欒賓傳之師服曰吾聞

國家之立也本大而末小是以能固故天子建國諸侯立家卿置

側室大夫有二宗士有隸子弟今晉甸侯也而建國本既弱矣其

能久乎昭侯即位封成師於曲沃號為桓叔曲沃邑大於翼翼晉

君都邑也桓叔封時年五十八矣好德晉國之眾皆附焉君子曰

晉之亂其在曲沃矣末大於本而得民心不亂何侍

桓叔傾晉附

詩唐風楊水曰楊之水白石鑿鑿素衣朱襮從子於沃既見君子

云何不樂楊之水白石皓皓素衣朱繡從子於鵠既見君子云何

其憂楊之水白石粼粼我聞有命不敢以告人

詩序楊之水刺晉昭公也昭公分國以封沃沃盛彊昭公微弱

國人將叛而歸沃焉

集註詩文明白序說不誤言水緩弱而石巉巖以比晉衰而沃

盛故欲以諸侯之服從桓叔於曲沃且自喜其見君子而無不樂也聞其命而不敢告人者爲之隱也桓叔將以傾晉而民爲之隱蓋欲其成矣

慶源輔氏曰晉昭侯非有大無道之事以自絕於民也特以其微弱不振日就萎蕪故國人以爲不足恃賴而相與離叛惟沃之強是歸焉以是知君人者蓋不必淫刑厚斂爲足以失人心而威靈氣燄又有以興起人氣天下之大人之心之衆固非奄奄欲盡之氣所能統攝也

李氏曰古者不軌之臣欲行其志必先施小惠以收衆情然後民翕然從之田氏之於齊亦猶是也故其召公子陽生於魯國人皆知其已至而不言所謂我聞有命不敢以告人也

華谷嚴氏曰命謂桓叔命其徒以舉事禍將作矣我聞其事不敢告人乃所以深告昭公

詩椒聊曰椒聊之實蕃衍盈升彼其之子碩大無朋椒聊且遠聊且椒聊之實蕃衍盈勺彼其之子碩大且篤椒聊且遠聊且

詩序椒聊刺晉昭公也君子見沃之盛強能修其政知其蕃衍盛天子孫將有晉國焉

集註此詩不知其所指序亦以爲沃也

華谷嚴氏曰此詩言桓叔之強而不及昭公其意則憂昭公之弱言在此而意在彼也

慶源輔氏曰楊之水椒聊之詩述當時民情棄舊君而樂桓叔也如此則其俗之薄甚矣聖人曷取焉夫民罔常懷懷於有仁

民之去就係上之人如何耳上之無道而貴民之我棄不可也
是以古之聖人臨乎民上凜乎若朽索之馭六馬焉凡有不得
者皆反求諸已而已故聖人錄此二詩以見民無常懷而在上
者不可不强於自治也

卮言曰瓜之近本者微而遠者大椒之幹附於本而枝益遠周雅
取喻於瓜瓞而周王千年唐風托興於椒聊而晉霸累世不但詠
物之精亦可謂前知之哲矣

史記昭侯七年晉大臣潘父弒昭侯而迎桓叔桓叔欲入晉晉人
發兵攻桓叔桓叔敗還歸曲沃晉人共立昭侯子平為孝侯誅潘
父

竹書平王三十二年晉昭侯七年壬寅晉潘父弒其君昭侯納成師不克立

昭侯之子孝侯晉人殺潘父

孝侯平昭侯子

史記孝侯八年曲沃桓叔卒子緝代桓叔是為曲沃莊伯孝侯十
五年曲沃莊伯弒孝侯於翼晉人攻曲沃莊伯復入曲沃晉
人復立孝侯子郟為鄂侯

竹書平王四十年庚戌晉曲沃桓叔成師卒子緝立是為莊伯自是晉侯

在翼稱翼侯四十二年狄人伐翼至於晉郊四十七年丙辰晉曲沃莊伯

入翼弒孝侯晉人逐之立孝侯子郟是為鄂侯

鄂侯郟世本作郟他本作却孝侯子即位二年己未魯隱公初立六年卒

左傳隱公五年癸亥春曲沃莊伯以鄭人邢人伐翼王使尹氏武氏

助之翼侯奔隨四月曲沃叛王秋王命虢公伐曲沃而立哀侯於

翼六年甲子夏翼九宗五正頃父之子嘉父逆晉侯於隨納諸鄂晉人謂之鄂侯

史記曲沃莊伯聞晉鄂侯卒乃與兵伐晉周平王使虢公將兵伐曲沃莊伯莊伯走保曲沃晉人共立鄂侯子光為哀侯

竹書桓王元年壬戌十月莊伯以曲沃叛伐翼公子萬救翼荀叔軫

追之至於家谷翼侯焚曲沃之禾而還翼侯伐曲沃大捷武公請

成於翼至相而還二年王使虢公伐晉之曲沃晉鄂侯卒曲沃莊

伯復攻晉立鄂侯子光是為哀侯胡氏曰此類與春秋書法正同足徵春秋之文多曾史舊不必

盡聖裁也公子萬十四字與孟子子濯孺子文體大類哀侯下條復有此十四字則重出矣

哀侯光鄂侯子

左傳桓公三年辛未冬哀侯侵陘庭之田陘庭南鄙啓曲沃伐翼三

年壬申春曲沃武公伐翼次於陘庭韓萬御戎逐翼侯於汾陽夜獲

之

史記哀侯二年曲沃莊伯卒子稱代莊伯立是為曲沃武公哀侯

九年武公伐晉虜哀侯晉人乃立哀侯子小子為侯

竹書桓王四年乙巳曲沃莊伯卒子稱立是為武公五年丙寅荀人董

伯皆叛曲沃十一年曲沃獲晉哀侯晉人立哀侯子為小子侯

小子侯哀侯子

禮記曰天子未除喪曰予小子生名之死亦名之鄭玄曰晉有小

子侯是取之天子也

左傳桓公七年丙子冬曲沃伯誘晉小子侯殺之八年丁丑春滅翼冬

王命虢仲立哀侯之弟緡於翼

史記小子元年曲沃武公使韓萬殺哀侯曲沃益彊小子四年武公誘召小子殺之周桓王使虢仲伐曲沃武公入於曲沃乃立哀侯弟緡爲晉侯

竹書桓王十三年

晉小子侯四年甲戌

曲沃伯誘晉小子侯殺之晉曲沃滅

荀以其地賜大夫原氏黯是爲荀叔十四年乙亥王命虢仲伐曲沃立晉哀侯弟緡於冀爲晉侯

晉侯緡哀侯弟

武公稱曲沃桓叔之孫莊伯之子伐晉滅之周僖王命爲晉侯

左傳桓公十六年

癸卯

冬王使虢公命曲沃伯以一軍爲晉侯

史記侯緡二十八年曲沃武公伐晉侯緡滅之盡以其寶器賂周釐王王命武公爲晉君列爲諸侯於是盡併晉地而有之曲沃武

公已卽位三十七年矣更號曰晉武公是年齊桓公始霸自桓叔

初封曲沃以至武公滅晉凡六十七歲而卒代晉二歲卒

竹書莊王元年

乙酉

曲沃尚一軍異於晉僖王三年

壬寅

曲沃武公

滅晉侯緡以寶獻王王命武公以一軍爲晉侯

國語鄭桓公問於史伯曰若周衰諸姬其孰興對曰臣聞之武實昭文之功文之胙盡武其嗣乎武王之子應韓不在其在晉乎距

險而隣於小若加以德可以大啓

詩無衣曰豈曰無衣七兮不如子之衣安且吉兮豈曰無衣六兮

不如子之衣安且燠兮

詩序曰無衣美晉武公也武公始并晉國其大夫爲之請命乎天子之使而作是詩

集註武公伐晉滅之盡以其寶器賂周釐王王命武公爲晉君
列於諸侯詩蓋述其請命之意言我非無是衣而必請命蓋蓋
以不如天子之命服之爲安也蓋當是時周室雖衰與刑猶在
武公既負弑君篡國之罪則人得討之而無以自立於天地之
間故賂王命而爲說如此然其倨慢無禮亦已甚矣釐王貪其
寶玩誅討不加而爵命行焉則王綱於是不振而人紀幾乎絕
矣嗚呼痛哉

華谷嚴氏曰武公之事國人所不與也以晉世家考之初潘父
弑昭侯而迎桓叔欲入晉晉人發兵攻桓叔共立孝侯此桓叔
初舉而國人不與也其後曲沃莊伯弑孝侯於翼晉人又攻莊
伯復立鄂侯此莊伯再舉國人又不與也及鄂侯卒莊伯伐晉
晉人又立哀侯此莊伯三舉國人又不與也及武公誘小子侯
殺之晉復立侯緡此武公四舉國人終不與也最後武公伐晉
滅之賂王請命列爲諸侯然後晉人不得已而從之耳聖人致
嚴於名分之際陳成子之事至沐浴而請無衣之詩不刪者著
世變之窮傷周之衰也

卮言曰自古篡逆之禍未有如曲沃之慘也晉人三立君而三
弑之橫肆不道至於是極矣平王不問桓王又使尹武助之僖
王又加命焉於是強國勢家益無所忌君臣上下惟力是視而
亂臣賊子接跡矣夫曲沃謀之數世而周失之數世武獻而後
晉日以霸興衰倚伏之幾孰測天命哉

獻公僖諸武公子在位二十六年

元乙巳

奚齊卓子皆獻公子驪姬子

史記曰獻公卒里克殺驪姬子奚齊於喪次荀息立奚齊弟悼子而傳之里克弒悼子於朝使迎公子夷吾於梁立為惠公

惠公夷吾獻公子在位十四年 元辛未

懷公圉惠公子即位一年秦繆公發兵內公子重耳使人告欒卻之黨為內應殺懷公於高粱入重耳為文公

文公重耳獻公子惠公兄在位八年 元丙戌

襄公驪文公子在位七年 元甲午

靈公夷臯襄公子在位十四年趙盾使趙穿弒之 元辛丑

成公黑臀文公少子其母周女也趙盾弒靈公迎成公於周而立之

在位七年 元乙卯

景公據靈公子在位十九年 元壬戌

厲公壽曼景公子即位八年殺三卻欒書中行偃襲執厲公囚之 元辛巳

悼公周襄公會孫欒書中行偃弒厲公而立之在位十五年 元巳丑

史記悼公會孫其大父捷襄公少子也不得立號為桓叔桓叔生惠伯談談生悼公欒書中行偃弒厲公迎悼公於周而立之十五年卒

年卒

平公彪悼公子在位二十六年 元甲辰

昭公夷平公子在位二十六年 元庚午

頃公去疾昭公子在位十四年 元丙戌

定公午頃公子在位三十七年卒 元庚寅

出公鑿定公子在位十七年 元丁卯

史記出公十七年為四卿所攻奔齊道死知伯乃立昭公會孫驕

竹書貞定王十一年 晉出公十七年 癸未晉出公奔齊十七年 出公二十三年 晉

出公薨乃立昭公之孫是為敬公 元年 考王十一年 辛丑 晉敬公卒

哀公驕昭公會孫 史記竹書不詳前後條 在位十三年

史記曰哀公大父雍昭公少子也號為戴子 世本作桓子 雍注云戴子 戴子生

忌忌善知伯早死故知伯欲盡并晉未敢乃立忌子驕哀公

索隱曰趙世家云驕是為懿公又年表云出公十八年次哀公

忌二年次懿公驕十七年紀年又云出公二十三年奔楚乃立

昭公之孫是為敬公世本亦云昭公夷生桓子雍雍生忌忌生

懿公驕然晉趙世家及年表竝皆不同何况紀年

幽公柳哀公子十八年幽公淫婦人夜竊出邑中為盜所殺魏文侯

以兵誅晉亂立烈公 元癸卯竹書元壬寅

烈公止幽公子即位十九年周威烈王賜韓趙魏皆命為諸侯二十

七年烈公卒 元壬戌

索隱曰系本幽公生烈成公止又年表云魏誅幽公立其弟止也

孝公頎烈公子在位十七年 元巳丑

索隱曰世本云孝公頎欣紀年以孝公為桓公故韓子有晉桓侯

竹書安王九年 戊子 晉烈公卒子桓公立十五年 甲午 晉太子喜出奔

烈王六年 辛亥 韓共侯趙成侯遷晉桓公于屯留 以後更無晉事

靜公俱酒 世本云靜公俱 孝公子在位二年 元甲辰終乙巳

史記靜公二年 乙巳 魏武侯韓哀侯趙敬侯滅晉而三分其地靜公

遷為家人晉絕不祀

索隱曰紀年云魏武侯以桓公十九年卒韓哀侯趙敬侯竝以桓公十五年卒又趙世家烈侯十六年與韓分晉封晉君端氏其後十年肅侯徙晉於屯留不同也

右晉始叔虞終靜公凡二十五世四十君七百四十一年

鄭世章

桓公友周宣王弟也宣王二十二年封於鄭

國語桓公問太史伯曰王室多故余懼及焉其何所可以逃死史伯對曰王室將卑戎狄必昌不可偏也當成周者南有荆蠻申呂應鄧陳蔡隋唐北有衛燕翟鮮虞路洛泉徐蒲西有虞虢晉隗霍楊魏芮東有齊魯曹宋滕薛鄒莒是非王之支子母弟甥舅也則

皆蠻荆戎翟之人也非親則頑不可入也其濟洛河潁之間乎是其子男之國虢鄆為大虢叔恃勢鄆仲恃險是皆有驕侈怠慢之心而加之以貪冒君若以周難之故寄孥與賄焉不敢不許周亂若克二邑鄆蔽補丹依燿歷莘君之土也若前莘後河右洛左濟王茱駝而食溱洧謂居其山食其水也脩典刑以守之惟是可以少固公曰南方不可乎對曰夫黎為高辛氏火正命曰祝融其功大矣其後入姓於周末有侯伯或在王室或在夷翟莫之數也融之興者其在莘姓乎莘姓惟荆實有昭德周衰其必興矣史記云楚興非鄭之利也公曰謝西之九州何如對曰其民沓貪而忍不可因也惟謝邾之間謂邾在馬其冢君侈驕其民怠沓其君而未及周德若更君而周訓之是易取也且可長用也公說乃東寄孥與賄虢鄆受之十邑

皆有寄地

史記世家曰鄭桓公友者周宣王庶弟也宣王二十二年友初封

於鄭在京兆封三十三歲百姓皆使愛之幽王以為司徒和集周民

周民皆說河頌之間人便思之為司徒一歲幽王以褒后故王室

治多邪諸侯或畔之於是桓公問太史伯曰王室多故予安逃死

乎太史伯對曰獨頌之東土河濟之南可居公曰何以對曰地近

虢鄆虢鄆之君貪而好利百姓不附今公為司徒民皆愛公公誠

請居之虢鄆之君見公方用事輕分公地公誠居之虢鄆之民皆

公之民也桓公曰善於是卒言王東徙其民頌東而虢鄆果獻十

邑竟國之二歲犬戎殺幽王於驪山下竝殺桓公

韋注曰桓公之子武公竟取十邑之地而居之今河南新鄭

竹書宣王二十二年甲午王錫王子多父命居洛幽王二年辛酉晉文

侯同王子多父伐鄆克之乃居鄭父之丘是為鄭桓公八年丁卯王

錫司徒鄭伯多父命十一年犬戎入宗周弒王及鄭桓公

詩傳序曰鄭本在西都畿內咸林之地宣王以封其弟友為采地

後為幽王司徒而死於犬戎之難是為桓公其子武公定平王於

東都亦為司徒又得虢鄆之地乃徙其封而施舊號於新邑是為

新鄭咸林在今華州鄭縣新鄭即今之鄭州是也

武公桓公子

詩序緇衣美武公也父子竝為周司徒善於其職國人宜之故美

其德以明有國善善之功焉

索隱曰譙周二名突滑皆非也蓋古史失其名太史公循舊失而

妄記之耳武公孫昭公名忽厲公名突豈有孫與祖同名乎當是舊史禱記昭厲忽突之名遂誤以掘突為武公之字耳

竹書平王三年癸酉王錫司徒鄭伯命四年甲戌鄭人滅虢六年丙子鄭

遷於溱洧八年戊寅鄭殺其大夫關其思

莊公寤生武公子即位二十二年魯隱公之元年巳未也夏五月經

書鄭伯克段於鄆四十三年卒

昭公忽莊公子庚午即位三月出奔衛乙酉復入二年丁亥為高渠

彌所弑

史記昭公母鄧女也莊公又娶宋雍氏女生公子突昭公既立宋

莊公誘執祭仲以突歸立之昭公奔衛突立是為厲公厲公四年

謀殺祭仲不得遂出居櫟祭仲復迎昭公即位二年為高渠彌所

弑

厲公突莊公庶子辛未逐昭公自立乙酉出奔蔡復入居櫟辛丑殺

子儀復位七年卒共在位十二年

史記昭公二年為高渠彌所弑乃更立昭公弟子亶為君子亶元

年齊襄會諸侯於首丘殺子亶於會祭仲召子亶弟公子嬰於陳

而立之是為鄭子左傳鄭子名子儀史記云嬰鄭子十四年厲公在櫟使人誘

劫大夫傅瑕而盟瑕因殺鄭子及其二子而迎厲公復入即位厲

公後七年卒厲公初立四歲居櫟十七歲復入立七歲興亾凡二

十八年

子亶昭公弟高渠彌弑昭公立之凡二月齊殺之

子儀昭公弟祭仲立之在位十四年厲公殺之元戊子終辛丑

文公躒厲公子在位四十五年 元巳酉

穆公蘭文公子在位二十二年 元甲午

靈公夷穆公子元年子公子家謀弑之 元丙辰

襄公鄭人堅靈公庶弟堅鄭人立之在位十八年 元丁巳

悼公潛襄公子在位二年 元乙亥

成公踰悼公弟在位十四年 元丁丑

僖公髡頑 史記云子暉 成公子在位五年為子駟所弑 元辛卯

簡公嘉僖公子在位三十六年 元丙申

定公寧簡公子在位十六年 元壬申

獻公薑定公子在位十三年 元戊子

聲公勝獻公子在位三十七年 年表云三十八年元辛丑

哀公易聲公子在位八年鄭人弑之而立共公 元巳卯

共公丑聲公弟在位三十年 元丁亥

幽公已共公子即位元年韓武子伐鄭殺幽公鄭人立繻公 元丁巳

繻公駘幽公弟 年表曰鄭立幽公子駘繻 鄭人立之在位二十七年子陽之黨共

弑繻公駘而立幽公弟乙 元巳未

康公乙幽公弟 年表云幽公子 在位二十一年庚子韓哀侯滅鄭并其國 元丙

戌終丙午

徐廣曰一本云立幽公弟乙陽為君是為康公六國年表云立幽

公子駘又以鄭君煬為鄭康公乙班固云鄭康公乙為韓所滅

右鄭始桓公友終康公乙凡二十一世二十三君四百三十年

黃氏曰鄭近王畿而介齊晉楚之間蓋春秋要領之國其初周鄭

交惡為王室之罪人其中堅於從楚為霸者之罪人其後轉移於七穆之手有罪不討又為諸侯之罪人欲後亾得乎罕

李氏琪曰嘗觀之詩鄭風二十有一篇清人而下五詩皆刺其不能達小人而用忠賢鷄鳴而下皆刺其失婚姻之道無室家之節夫不信仁賢則國空虛無禮義則上下亂鄭晉有之矣罕渾曰鄭先衛法偏而無法以經考之鄭之先亾豈直無法哉

燕世章

召公奭與周同姓姓姬氏

史記曰周武王之滅紂封召公於北燕

索隱曰召公始食采於召故曰召公後武王封之北燕在今幽州薊縣故城是也亦以元子就封而次子留周室代為召公

惠侯召公九世孫在位三十八年

史記曰燕惠侯當周厲王奔彘共和之時惠侯卒

年表惠侯三十四共和元庚申

索隱曰自召公已下九世至惠侯並國史先失也又自惠侯已下皆無名亦不言屬惟昭王父子未詳蓋在戰國時旁見他說耳燕四十二代有二惠侯二釐侯二宣公三桓侯二文侯蓋國史微失

本謚故重耳

茅坤曰燕僻處北鄙不與未詳及其境內賢人君子所通於

上國者蓋少故史記燕世家所書不數特以紀世次而已

紀年宣王元年甲戌燕惠侯薨

僖侯惠侯子在位二十一年

竹書宣王三十七年辛亥燕僖侯卒

史記僖侯元年周宣王初即位

年表宣王二年燕僖侯莊元年

頃侯僖侯子在位二十四年

竹書平王四年甲戌燕頃侯卒

史記頃侯二十年周幽王為犬戎所殺

哀侯頃侯子在位二年

竹書平王六年丙子燕哀侯卒

鄭侯

索隱曰謚法無鄭鄭或是名

哀侯子在位三十六年

史表元丁丑

穆侯鄭侯子在位七年魯隱公元年己未也十八年卒

元癸丑

宣侯穆侯子在位十三年

元辛未

索隱曰世本謂燕自宣侯已上皆父子相傳故無所疑桓侯已下並不言屬以其難明故也按今系本無燕代系宋忠依太史公書以補其闕尋徐廣作音義尚引系本蓋近代始散逸耳

桓侯宣侯子在位七年

元甲申

莊公桓侯子在位三十三年

元庚寅

史記莊公十六年與宋衛共伐周王惠王出奔濫立惠王弟爲王十七年鄭執燕仲父而內惠王於周二十七年山戎來侵我齊桓公救燕遂北伐山戎而還燕君送齊桓公出境桓公因割燕所至地予燕使燕共貢天子如成周時職使燕復脩召公之法三十三年卒

索隱曰譙周云據左氏燕與衛伐周惠王乃是南燕姑姓而系家以爲北燕伯故著史考云北燕是姑姓今檢左氏莊十九年衛師燕師伐周二十年鄭伯和王室不克執燕仲父是冬齊人伐山戎三十年齊伐山戎傳曰謀山戎以其病燕故也據傳文及此記元是北燕不疑杜君二女說仲父是南燕伯爲伐周故且燕衛俱是偃姓故有伐周納王之事若是姑燕與衛伐周則

鄭何以獨伐燕而不伐周乎

余氏有丁曰按南燕納王者以其近周也若北燕則遠且春秋時亦不著觀昭三年春秋特書北燕伯款可見

厄言曰燕在今北直隸順天府衛在今直隸大名府正是隣境索隱之辨甚悉吳越大國皆以僻遠不著於春秋何疑北燕哉

襄公莊公子在位四十年 元甲子

桓公襄公子在位十六年 元甲辰

索隱曰譙周云系家襄伯生宣伯無桓今檢史記並有桓公立十六年又宋忠據此史補系家亦有桓公是允南所見本異則是燕有三桓公也

宣公桓公子在位十五年 元巳未

昭公宣公子在位十三年 元乙亥

武公昭公子在位十九年 元戊子

文公武公子在位六年 元丁未

懿公文公子在位四年 元癸未

惠公懿公子在位九年 元丁巳

春秋昭公三年 壬戌 冬北燕伯款出奔齊

左傳燕簡公多嬖寵欲去諸大夫而立其寵人冬燕大夫比以殺公之外嬖公懼奔齊書曰北燕伯款出奔齊罪之也

六年 乙丑 冬齊侯伐北燕

左傳十一月國侯如晉請伐北燕也晉侯許之齊侯遂伐北燕將納簡公晏子曰不入燕有君矣民不貳吾君賄左右諂諛作

大事不以信未信可也

汪氏曰晉人納捷菑於邾則書弗克納此不書齊侯納北燕伯弗克納者諸侯失國諸侯納之正也非奉少奪長之比也但齊景受賂而退故止書伐北燕若以強凌弱而非納燕君耳

昭公十二年辛未春齊高偃帥師納北燕伯於陽

左傳春齊高偃納北燕伯款於唐因其眾也

穀梁傳納者內不受也燕伯之不名何也不以高偃挈燕伯也

胡氏曰諸侯失國諸侯納之正也大夫納之非也

高氏曰三年北燕伯款出奔齊六年齊將納之而不果款播越在外蓋十年矣不能自復而藉齊之力僅能納之於別邑而已

失國之難反如此

史記惠公六年多寵姬欲去諸大夫而立寵姬宋大夫共誅姬宋

惠公懼奔齊四年齊高偃如晉請共伐燕入其君晉平公許與齊

伐燕入惠公惠公至燕而死

索隱曰春秋昭三年北燕伯款奔齊至六年又云齊伐北燕一

與此文合左傳無納款之文而云將納簡公晏子曰燕君不入

矣齊遂受賂而還事與此乖而又以款為簡公簡公後惠公四

代則與春秋經傳不相協未可強言也

卮言曰北燕伯款出奔齊齊始將納之不果後復納之於陽此

春秋經傳之文史記亦無大乖索隱之說非也特史記以簡公

為惠公惠公後四十年方有簡公疑左傳簡字之誤

悼公

以下俱不在位七年

元丙寅

詳其世系

其公在位五年

元癸酉

平公在位九年

元戊寅

簡公在位十一年

元丁酉

獻公在位二十八年

元巳酉

索隱曰王邵按紀年簡公後次孝公無獻公

春秋哀公十五年

庚申

夏五月齊高丕出奔北燕

經書北燕止此

孝公獻公子在位十五年

元丁丑

成公

紀年云成侯載

在位十六年

元壬辰

閔公在位二十一年

元戊申

僖公在位二十年

元巳卯

史記魯公元年二晉列為諸侯三十年伐齊敗於林營釐公卒

索隱曰按紀年作文公二十四年卒簡公立十三年而三晉命為

諸侯簡公四十五年卒與史記不同妄也

桓公僖公子在位十一年

元巳酉

文公桓公子在位二十九年

元庚申

史記文公二十八年巳未蘇秦始來見文公文公資車馬金帛以

至趙趙肅侯用之因約六國為從長秦惠王以其女為燕太子婦

易王文公太子在位十年戊戌稱王十二年卒

元巳丑

王噲易王子即位五年以國讓其相子之

元辛丑

史記燕噲既立子之相燕貴重主斷二年蘇代為齊使於燕燕王問齊王何如對曰不信其臣必不霸於是燕王大信子之鹿毛壽因謂燕王不如以國讓子之子之南面行王事而噲老不聽政願

為臣國事皆決於子之三年國大亂齊王伐燕士卒不戰城門不閉燕君噲死齊大勝燕二年而燕人共立太子平是為燕昭王

昭王平王噲子燕人立為王在位三十三年

元庚戌

惠王昭王子在位七年

元癸未

索隱曰按趙世家惠文王二十八年燕相成安君公孫操弒其王

樂資以為即惠王也徐廣曰按年表是年燕武成王元年武成即

惠王子則惠王為成安君弒明矣此不言者燕遠諱不告或太史

公之說踈也

武成王惠王子在位十四年

元庚寅

孝王武成王子在位二年

元甲辰

王喜孝王子在位三十三年秦拔遼東虜燕王喜遂滅燕元丁未

右燕自召公至王喜凡三十四世九百年

太史公曰召公奭可謂仁矣甘棠且思之况其人乎燕北迫蠻貊

內措齊晉崎嶇強國之間最為弱小幾滅者數矣然社稷血食者

八九百歲於姬姓獨後亾豈非召公之烈耶

蘇子古史曰燕召公之後然國於蠻貊之間禮樂微矣春秋之際

未嘗出與諸侯會盟至於戰國亦以耕戰自守未嘗被兵自蘇秦

入燕而兵無寧歲太子丹之謀又秦所不取也

陳氏曰姬姓後亾惟燕召公其醫家所謂厄羸壽考歟

王氏曰戰國七國齊魏趙韓皆大夫墓楚為黃秦為呂惟燕為舊

國召公之澤遠矣

吳世章

吳泰伯周太王之長子

史記世家曰吳泰伯泰伯弟仲雍皆周太王之子而王季歷之兄也季歷賢而有聖子昌太王欲立季歷以及昌於是太伯仲雍二人乃奔荆蠻文身斷髮示不可用以避季歷季歷果立是爲王季而昌爲文王泰伯之奔荆蠻自號句吳荆蠻義而歸之立爲吳泰伯

穆傳曰太王亶父之始作西土封其元子吳泰伯於東吳詔以金刃之刑賄用周室之璧

韋昭曰泰伯奔荆蠻後武王追封爲吳伯故曰吳泰伯

索隱曰國語云黃池之會晉定公使謂吳王夫差曰夫命圭有命周曰吳伯不曰吳王是吳本伯爵也范甯解論語曰泰者善大之稱伯者長也周太王之元子故曰泰伯稱仲雍季歷皆以字配名則伯亦是字又是爵但其名史籍先闕爾吳國號也荆者楚之舊號以州而言之曰荆蠻者通爲南夷之名蠻亦稱越此言自號句吳吳名起於泰伯明以前未有吳號地在楚越之界故稱荆蠻頭師古注漢書以吳言句者夷之發聲猶言於越耳

正義曰吳國號也泰伯居梅里在常州無錫去東南六十里至十九世孫壽夢居之號句吳壽夢卒諸樊南徙吳至二十一代孫光使子齊築闔廬城都之今蘇州也

左傳哀公七年公會吳於鄆子貢對太宰嚭曰大國不以禮命於諸侯苟不以禮豈可量也泰伯端委以治周禮仲雍嗣之斷髮文

身羸以爲飾豈禮也哉有由然也

正義曰泰伯仲雍二人同時適吳而泰伯端委仲雍斷髮者泰伯初往未爲彼君故服其本服自治周禮及仲雍民歸稍多旣爲彼君宜從彼俗曲禮云君子行禮不求變俗仲雍爲彼人主不能行周人之禮致中國之化故文身斷髮放效吳俗言其權時制宜以辟災害非以爲禮也漢書地理志云越人文身斷髮以辟蛟龍之害應劭曰常在水中故斷其髮文其身以象龍子故不見傷害杜言辟害辟此蛟龍之害泰伯之時未有周禮言治周禮者謂治其本國岐周之禮非周公所制禮也羸以爲飾者羸其身體以文身爲飾也端委禮衣者王肅云委貌之冠玄端之衣也此傳言泰伯端委仲雍斷髮史記云二人皆文身斷髮然則文身斷髮自辟害耳史記以爲示不可用一人亾去遠適荆蠻則周人不知其處何以須示不可用也皆馬遷謬耳

方氏鵬曰春秋周簡王十年晉會吳於鍾離呂氏曰晉開門延盜以來斷髮文身之夷夫斷髮文身吳俗故嘗有之泰伯仲雍所居則化矣必不棄中國衣冠禮義之習而反變於夷也大雅云因心則友則友其兄蓋王季卽位之後必訪求二兄之所在使命之不絕禮意之不遺可想見矣若果文身而裸是禽獸也泰伯兄弟豈能安之而王季之使亦何從而至哉

卮言曰論語子曰泰伯可謂至德也三以天下讓民無得而稱焉史記云逃之荆蠻荆蠻義而君之而穆傳云太王封元子泰伯於東吳當太王時商有天子而吳在東陲太王安能封子此妄說也

逃荆之說不一又詳帝王曆系

仲雍泰伯弟

史記曰泰伯卒無子弟仲雍立是為吳仲雍

索隱曰伯仲季是兄弟次第之字若表德之字義意與名相符則系本曰吳孰哉居藩籬宋衷曰孰哉仲雍字藩籬今吳之餘暨也解者云雍是孰食故曰雍字孰哉

周章仲雍曾孫

史記曰仲雍卒子季簡立季簡卒子叔達立叔達卒子周章立是時周武王克殷求泰伯仲雍之後得周章周章已君吳因而封之乃封周章弟虞仲於夏虛是為虞仲自泰伯作吳五世而武王克殷封其後為二其一虞在中國其一吳在夷蠻

句卑周章十三世孫

史記曰周章卒子熊遂立熊遂卒子柯相立柯相卒子彊鳩夷立彊鳩夷卒子餘橋疑吾立餘橋疑吾卒子柯廬立柯廬卒子周繇立周繇卒子屈羽立屈羽卒子夷吾立夷吾卒子禽處立禽處卒子轉古史考云何轉立轉卒子頗高古史考作頗夢立頗高卒子句卑立古史考云畢軫是時晉獻公滅虞句卑卒子去齊立去齊卒子壽夢立

王壽夢泰伯十九世孫去齊之子嗣位稱王在位二十五年元丙子

史記壽夢立而吳始益大稱王自泰伯作吳五世而武王克殷封其後為二其一虞在中國其一吳在夷蠻十二世而晉滅中國之虞中國之虞滅二世合七十一年而吳稱王而夷蠻之吳興大凡從泰伯至壽夢十九世

春秋成公七年

吳王壽夢二年丁丑

春正月吳伐郟

胡傳稱國以伐狄之也吳本泰伯之後以族屬言則周之伯父也何以狄之爲其僭號也吳本伯爵後雖益熾浸與中國會盟進而書爵不過曰子亦不以本爵與之故紀於禮書曰四夷雖大皆曰子此春秋之法仲尼之制也

廬陵字氏曰吳自泰伯奔吳五世至周章而武王封之吳又十四世至壽夢而始大僻稱王此卽壽夢之二年也蓋成公二年楚申公巫臣奔晉求通吳以罷楚於是吳兵荐及上國矣此爲書吳之始終春秋書伐郟伐陳入州來入郢滅州來滅巢滅徐戰長岸雞父皆書國雖會鍾離會善道會相會向會鄆會橐臯亦書國惟襄五年於戚始書吳入襄十二年始書吳子卒二十

九年始書吳子以聘至伯舉書子已同於中國至黃池書子則主諸侯之詞矣後七世而亾於越

秋八月吳入州來

左傳楚子重怨申公巫臣子反欲取夏姬巫臣止之遂取以奔晉子反亦然之及共王卽位子重子反殺巫臣之族而分其室巫臣自晉遺二子書曰余必使爾罷於奔命以死巫臣請使於吳晉侯許之吳子壽夢說之乃通吳於晉教吳乘車教之戰陣教之伐楚宣其子狐庸焉使爲行人於吳吳始伐楚伐巢伐徐鄆陵之會吳入州來子重子反於是乎一歲七奔命蠻夷屬於楚者吳書取之是以始大通吳於上國
陳氏曰吳楚交兵不書至是始書之始大通吳於上國晉人爲

之也盟於蒲景公將始會吳吳不至於鍾離而後至盟於雞澤
悼公又逆吳子吳不至於戚而後至吳不敢自列於諸夏而晉
求之急將以罷楚也楚罷晉亦不復伯矣入州來不可不謹其
始也

成公十五年吳壽夢冬十一月叔孫僑如會晉士燮及諸侯會吳
於鍾離之大夫

永嘉呂氏曰吳伐郊始見於經於是吳為中國患矣此年會吳
於鍾離於是吳與中國會盟矣然所與同會者猶曰諸侯之大
夫也戚之會相之會則諸侯實與為會矣駟至黃池之會遂與
晉爭長而奄然主中國之盟會非晉之咎而誰哉

廬陵李氏曰晉之會吳六鍾離相向善道諸侯往與之會而主
吳故以殊會書而稱國外之也于戚吳人來與中國之會而不
為主故以列會書而稱人進之也黃池則吳晉兩霸而晉反為
吳後矣故亦以殊及書而稱子順內外之常著盟會之實也然
殊會之說如公穀胡氏則以為春秋外吳之筆如陳氏則以為
晉厲尊吳之文二意稍不同恐皆可用蓋惟諸國尊之為主所
以春秋外之為夷也語亦互通

襄公五年吳壽夢十秋公會諸侯凡十吳人鄆人於戚

公羊傳吳何以稱尺吳鄆人云則不辭

孫氏曰鄆微弱不可先也故吳序鄆上

程子曰吳來會非為主也

詳前條

汪氏曰以國稱者夷狄之常也此書人者予其慕義之善黃池

書子紀其主會之仇也

十二年

吳壽夢二十五年庚子

秋九月吳子乘卒

左傳秋吳子壽夢卒臨於周廟禮也

蜀杜氏曰宣十八年書楚子旅卒此書吳子卒皆以其暴盛而諸侯通會赴告之相親也

王諸樊壽夢子在位十三年

元辛丑

史記壽夢有子四人長曰諸樊次曰餘祭次曰餘昧季札賢而壽夢欲立之季札讓不可於是乃立長子諸樊攝行當國

春秋襄公十四年

吳諸樊三壬寅

春正月季孫宿會晉士匄

及諸侯之大夫

會吳

於向冬楚公子貞帥師伐吳

二十五年

吳諸樊三十三年癸丑

冬十一月吳子遏伐楚門於巢卒

左傳吳子諸樊伐楚門於巢巢牛臣隱於短墻以射之卒

王餘祭諸樊弟在位十七年

元甲寅

史記曰諸樊卒有命授弟餘祭欲傳以次致國於季札而止以稱

先王壽夢之意

詳繼統類

春秋襄公二十九年

吳餘祭四丁巳

夏五月闔弒吳子餘祭

左傳吳人伐越獲俘焉以為闔使守舟吳子餘祭觀舟闔以刀

弒之

吳子使札來聘

杜氏曰餘祭既遣札聘上國而後弒札以六月至曾未聞喪也廬陵李氏曰札下稱公子杜氏以為其禮未同於中國公羊以為許夷狄者不一而足穀梁以為善使季子成尊於上而陳氏

又以為楚秦之使皆以再至而後進之今吳一聘而遂同於楚
椒秦術之例者吳驟強也書札如椒術者皆非命大夫之詞也
其說不一獨常山劉氏以為札不稱公子貶其辭國而生亂也
胡氏從之

王夷末公羊夷昧史記餘昧餘祭弟在十七年元戊午

春秋昭公五年吳夷末七甲子冬楚子蔡侯陳侯許男徐人越人伐吳

昭公十五年吳夷末七甲戌春正月吳子夷末卒

王僚餘末子在位十二年元乙亥

史記王餘昧卒欲授弟季札季札讓逃去於是吳人乃立王餘昧之子僚為王

索隱曰史記以僚為餘昧子公羊傳以為壽夢庶子吳越春秋與史記同

春秋昭公十七年吳王僚二丙子冬楚人及吳戰於長岸

陳氏曰楚令尹書人吳公子光書國略之也五年六年吳兩敗

楚不書書伐吳而已於是始書戰則以吳楚敵言之也

二十四年吳王僚九癸未冬吳滅巢

二十七年吳僚十二丙戌夏四月吳弒其君僚

胡傳此公子光使專諸弒之而稱國何也吳子壽夢有四子長
諸樊次餘祭次夷末次季札光諸樊之子也僚夷末之子也諸
樊兄弟以次相及必欲致國於季子而季子終不受則國宜之
光者也僚烏得為君故稱國以弒而不歸獄於其光

王闔廬初名光諸樊子世本云夷昧生光在位十九年元丁亥

春秋昭公三十二年吳闔廬五辛卯夏吳伐越

左傳始用師於越也史墨曰不及四十年越具有吳乎越得歲而吳伐之必受其凶

定公四年吳闔廬九乙未冬十一月庚午蔡侯以吳子及楚人戰於柏舉

楚人敗績庚辰吳入郢五年丙申夏於越入吳

胡傳吳何以稱子善伐楚解蔡圍也

十四年吳闔廬十九乙巳夏五月於越敗吳於檣李吳子光卒

左傳吳伐越句踐禦之闔廬傷而卒夫差使人立於庭苟出入必謂已曰夫差爾忘越王之殺爾父乎則對曰惟不敢忘三年乃報越哀公元年

王夫差闔廬子在位二十三年為越所滅元丙午終戊辰

左傳哀公元年吳王夫差二年丁未春吳王夫差敗越於夫椒報柏

舉也遂入越越王勾踐以甲盾五十保於會使大夫種因吳太宰嚭以行成

春秋哀公十二年吳夫差十四巳未春公會晉侯及吳子於黃池於越入

吳

左傳夏公會晉定公吳夫差於黃池六月越伐吳大敗吳師遂入吳吳人告敗於夫差夫差惡其聞也自到七人於幕下七月辛丑盟吳晉爭先吳人曰於周室我為長晉人曰於姬姓我為伯趙鞅呼司馬寅曰日旰矣大事未成二臣之罪也建鼓整列二臣死之長幼必可知也乃先晉侯

國語吳王夫差既勝齊乃起帥北征以會晉公午於黃池越王勾踐乃命范蠡率師襲吳入其郛焚其姑蘇徙其大舟吳晉爭

長未成邊遽乃至以越亂告吳王懼乃合諸大夫而謀王孫雒曰今夕必挑戰彼將不戰而先我吳王從之親秉鉞中陣而立既陳王乃秉枹親鼓之軍皆譁晉師大駭不出乃令董褐視事褐還致命乃告趙鞅曰臣觀吳王之色類有大憂將毒不可與戰主其許之先鞅乃令董褐復命曰曩君之言周室既卑諸侯大夫失禮於天子今君掩王東海以淫名聞於天子君有短垣而自踰之况蠻荆則何有於周室夫命圭有命固曰吳伯不曰吳王諸侯是以敢辭君若無卑天子而曰吳公孤敢不順從君命吳王許諾乃退就幕而會吳公先軟晉侯亞之許氏曰左氏云先晉國語云先吳此二國史籍之異也顧自宋之盟則晉人耻吳先之故諱焉耳

胡傳黃池衛地其言及者會兩伯之辭也吳人主會其先晉伯也常也其稱子正名也

公羊傳吳何以稱子吳主會也吳主會則曷爲先言晉侯不與夷狄之主中國也其言及吳於何會兩伯之辭也

左傳哀公二十二年吳夫差之二十三年戊辰十一月丁卯越滅吳請使吳王居甬東辭曰孤老矣焉能事君乃縊越人以歸

右吳始泰伯終夫差凡二十世二十五君共六百五十年

蘇氏古史曰吳自泰伯至壽夢十九世不通中國壽夢以下始與諸侯盟會七世而亾然孔子作春秋終以蠻夷書吳而不人蓋禮義不足故也春秋諸侯國而不人者三楚始稱荆僖元年書楚人文九年書楚子自是遂與諸齒而吳越終春秋不人此其禮義存

亾之實也故余因春秋所書而推考三國得失之效吳越皆戰勝
攻取能服人矣而無禮義以自將故闔廬之後復亾而不救句踐
之後固陋而無聞至於楚禮義雖不足道而亦無愧於秦晉其後
遂與戰國相終始由是觀之禮義豈誣也哉

黃氏日抄曰古史考訂史記之誤蘇子自注本文之下其論吳燕
皆起於僻陋之中而奮於諸侯之上非如商周先王以德服人故
皆爲禍其說亦當

廬陵李氏曰吳姬姓之長春秋夷之何也吳僻在海濱不與姬通
有年數矣至其極盛亦不過以子錄之蓋假名竊號不有宗周春
秋不得不深絕焉者也然嘗以經而考之觀其與晉強弱之形與
楚消長之勢則其事有不獨係一吳之盛衰者蓋其始盛也當晉
方患楚未暇於憂吳其後也當中國倚重於吳而吳亦甚有意於
駕晉又其後也晉伯不在諸侯中國亦甚易與則吳之所爭不在
晉而在楚又其最後也中國旣不足畏楚人亦不能強而吳之所
憂者乃不在楚而在越矣晉弱而吳強楚仆而吳興吳仆而越興
中國始展轉蒙患於夷狄吁是其事豈特係於一吳之盛衰已哉

學海君道部卷之二十二

世系類 二十

列國譜系 三

大國篇 三

宋世章

微子啓殷帝乙之元子紂之庶兄也周既克商封微子於宋

書序微子啓帝乙長子武王伐紂微子歸周成王既黜殷命殺武

庚命微子啓代殷後作微子之命

王若曰猷殷王元子惟稽古崇德象賢統承先王修其禮物作賓

王家與國咸休永世無窮嗚呼乃祖成湯克齊聖廣淵皇天眷佑

延受厥命撫民以寬除其邪虐功加于時德垂後裔爾惟踐修厥

猷舊有令聞恪慎克孝肅恭神人予嘉乃德曰篤不忘上帝時歆
 下民祗協庸建爾于上公尹茲東夏欽哉往敷乃訓慎乃服命率
 由典常以蕃王室弘乃烈祖律乃有民永綏厥位毗予一人世世
 享德萬邦作式俾我有周無斃嗚呼往哉惟休無替朕命

孔氏傳曰微畿內國名子爵也為紂卿士

集傳曰微國名子爵也成王既殺武庚封微子於宋以奉湯祀
 林氏曰語云微子去之微子當紂之時處可疑之地而去商亦
 遜於荒野而已及武王克商始抱祭器歸周武王使復其位初
 以殷之封爵居舊位也不曰宋公之命而曰微子之命蓋周以
 賓待之非欲臣之也箕子微子雖歸周而未嘗臣周所以與比
 干並稱三仁

吳氏曰武王克殷封武庚於殷墟封微子於宋樂記言武王下
 車投殷後於宋是也及武庚叛成王殺之始即微子已封之宋
 國建之為上公以奉湯祀蓋申命之書非先未封至此始封之
 也凡策命諸侯必有初封之辭如蔡仲之命乃命諸王邦之蔡
 之類此篇初無此等語也史記世家言其說為是且武王猶封
 箕子於朝鮮豈有捨微子不封待成王而後封乎

陳氏桎曰當武庚叛後殷餘民猶思商以微子之賢處疑忌之
 地而命之之辭如此聖人寬大公平之用心也

新安陳氏曰殺武庚紂子微子奉湯祀者蓋紂以嫡子立為天
 子武庚紂子實為大宗子微子不過支子爾武庚在為殷後奉
 湯祀者武庚也微子不得與也武庚死殷命黜微子始得代之

爲殷後也

史記世家曰宋微子啓者殷帝乙之首子而紂之庶兄也紂既立不明淫亂於政微子數諫紂不聽紂殺王子比干而囚箕子武王伐紂克殷微子乃持其祭器造於軍門肉袒面縛左牽羊右把茅膝行而前以告於是武王乃釋微子復其位如故武王封紂子武庚祿父以續殷祀使管叔蔡叔相之武王崩成王少周公攝行政管蔡疑之乃與武庚作亂周公東征誅武庚殺管叔放蔡叔乃命微子代殷後奉其先祀作微子之命以申之國于宋微子故能仁賢乃代武庚故殷之餘民甚戴愛之

羅氏泌曰以微子之賢吾君之子而商人父師之顧乃使之代商後而邦之宋宋爲故亳商之舊都民之被澤者固未忘也使微子少異其志則全商之地亦非周矣成王周公方且晏然命之不以爲疑卒以按堵非聖人之盛德能如是乎

楊氏慎曰微子肉袒面縛之事出于左氏乃楚人以誑莊王受鄭伯之降借名於武王而誣微子也史曰微子抱祭器而入周既入周矣又豈待周師至而後面縛乎卽抱器入周亦必無之事劉敞曰古者同姓雖危不去國微子紂庶兄也何入周之有論語云去之者去紂都也雖去不踰國斯仁矣

微子助祭于周

詩頌振鷺曰振鷺于飛于彼西雝我客戾止亦有斯容在彼無惡在此無斃庶幾夙夜以永終譽

孔氏曰客者敵主之言先代之後時王偏所尊敬特謂之客也

集註客謂二王之後夏之後杞商之後宋於周爲客天子有事
膺焉有喪拜焉者也此二王之後來助祭之詩彼其國也
三山李氏曰我客云者不純臣待之如所謂虞賓在位作賓王
家也

慶源輔氏曰在彼無惡其心公也在此無斃其心厚也公則順
天厚則盡道必如是然後可以永終此譽尊之曰客又以鷺比
所謂譽也庶幾不敢必之辭也

又有客曰有客有客亦曰其馬有萋有苴敦琢其旅有客宿宿有
客信信言授之繫以繫其馬薄言追之左右綏之既有淫威降福
孔夷

集註周既滅商封微子於宋以祀其先王而以客禮待之不敢
臣也殷尚白修其禮物仍殷之舊也萋且敬慎貌敦琢選擇也
旅其卿大夫從行者也此微子來見祖廟之詩始至而嘉之將
去而留之已去而復還之愛之無已也統承先王用天子禮樂
所謂淫威也

曹氏曰威等威也微子用其先王之車服禮樂其等威之大異
乎列國之諸侯矣

微仲衍微子弟

禮記曰微子舍其孫脯而立衍也

鄭玄曰微子適子死立其弟衍殷禮也

史記微子開卒立其弟衍是爲微仲

索隱曰家語微子弟仲思名衍一名泄嗣微子爲宋公雖遷爵易
位而班級不過其故故以舊官爲稱故二子雖爲宋公猶微至子

稽乃稱宋公

宋公稽譙周云未
謚故名之

史記曰微仲卒子宋公稽立宋公稽卒子丁公申立丁公申卒子
閔公共立閔公卒弟煬公熙立煬公即位閔公子鮒祀弒煬公而
自立是為厲公

索隱曰徐廣云鮒一作鮒譙周亦作鮒祀據左氏即濬公庶子
也弒煬公欲立太子弗父何何讓不受

僖公舉厲公子在位十七年周厲王出奔彘二十八年卒竹書厲王
二十三年

庚午宋
僖公薨

惠公閑僖公子在位四年周宣王即位三十年惠公卒

哀公史失
其名惠公子在位二年

戴公哀公子在位三十四年竹書平王五年
乙亥宋戴公薨

武司空立戴公子在位十八年竹書平王二十三
年癸巳宋武公卒

宣公力戴公子在位十年竹書平王四十二
年壬子宋宣公卒

穆公和宣公弟宣公病舍太子與夷而立和宣公卒和立是為穆公

穆公之七年魯隱公元年己未歲也九年辛酉八月春秋書宋公和

卒十二月書葬宋穆公元癸丑

殤公與夷宣公子穆公病出公子馮于鄭而命立與夷穆公卒與夷

立是為殤公在位十年華督弒之元壬戌

莊公馮穆公子華督弒殤公迎莊公子鄭而立之在位十九年元壬
申

閔公捷莊公子在位十一年南宮萬弒閔公而立公子游元己
丑

公子游

桓公禦說莊公子諸公子共殺游而立之在位二十一年 元庚子

襄公茲父桓公子在位十四年 元辛未

成公王臣襄公子在位十七年 元乙酉

公子禦成公第殺太子而自立為君宋人共殺禦而立昭公

昭公杵臼成公少子 年表云襄公之子 徐廣云成公少子 在位九年夫人王姬使衛伯

攻殺昭公立昭公弟鮑 元壬寅

文公鮑昭公第弒昭公自立在位二十二年 元辛亥

共公瑕文公子在位十三年 元癸酉

平公成共公少子在位四十四年 元丙戌

元公佐平公子在位十五年 元庚午

景公欒 史記景公頭曼 元公子在位六十四年 元乙酉

昭公得元公庶曾孫在位四十七年 年表云四十九年通鑑前編六十五年丁巳卒

左傳景公無子取元公庶曾孫公孫周之子得及啓畜于公宮及

景公卒先立啓後立得是為昭公

史記景公卒宋公子特攻殺太子而自立是為昭公昭公者元公

之曾庶孫也昭公父公孫糾糾父公子禘秦禘秦即元公少子也

景公殺昭公父糾故昭公怨殺太子而自立四十七年卒

悼公購由昭公子在位八年 竹書云十八年元戊寅

休公田悼公子 以下三君 史無其年

辟公辟兵休公子在位三年

索隱曰紀年作桓侯璧兵則璧兵謚桓也又莊子云桓侯行未出

城門其前驅呼辟蒙人止之後為狂也

剔成君辟公子在位四十一年第偃攻襲之剔成奔齊

索隱曰王邵按紀年云宋剔成肝廢其君壁而自立

宋王偃剔成弟逐剔成而自立為宋君十一年癸卯稱王四十三年

乙亥齊閔王與魏楚伐宋王偃走温歟遂滅宋而三分其地元癸巳終乙亥

索隱曰戰國策呂氏春秋皆以偃謚曰康王

右宋始微子終王偃二十三世三十二君八百二十一年

黃氏曰宋湯之後春秋常書公以列於諸侯之上反覆十三君行事非有可稱而聖人拳拳焉特以著三統之相承明王澤之當續也

杞世章

東樓公夏后禹之裔也妣姓周初封於杞

史記世家曰杞東樓公者夏后禹之苗裔也姓妣氏殷時或封或

絕周武王克殷紂求禹之後得東樓公封之於杞以奉夏后氏祀

索隱曰杞國名也東樓公謚號也地理志云雍丘縣故杞國周

武王封禹後為東樓公是也蓋周封杞而居雍丘至春秋時杞

已遷東國故左傳隱四年莒人伐杞取牟婁牟婁者東邑也僖

十四年傳杞遷緣陵地理志北海有營陵淳于公之縣臣瓚云

即春秋緣陵淳于公所都之邑又周國名杞後改國號曰州而

稱淳于公故春秋隱五年經云州公如曹傳曰淳于公如曹是

也然文十二年又稱子者以微小又僻居東夷

路史曰湯放桀既代夏政爰封少康之後於杞以郊禹後分於曹

東之僂是為東樓公周興求後得東樓公復之杞為二後

西樓公

史記曰東樓公生西樓公西樓公生題公題公生謀娶公謀娶公
生武公

卮言曰竹書周厲王二十四年書杞武公堯以後不書距春秋之
杞武公六十年必有誤也

武公西樓公孫謀娶公子卽位二十九年魯隱公元年己未也四十
七年卒

春秋隱公四年杞武公三十三壬戌春二月莒人伐杞取牟婁

杜氏曰書取言易也杞國本都陳留雍丘縣推尋事跡桓六年
淳于公亡國杞似并之遷都淳于僖十四年又遷緣陵襄二十
九年晉人城杞之淳于杞又遷都淳于牟婁杞邑城陽諸縣東

北有婁鄉

正義曰地理志云陳留郡雍丘縣故杞國武王封禹之後東
公是杞本都陳留雍丘縣也志又云北海郡淳于縣應劭曰春
秋州公如曹左氏傳曰淳于公如曹臣瓚案州國名淳于國之
所都此淳于縣於漢屬北海郡晉時屬東莞郡故釋例土地名
云州國都於東莞淳于縣以雍丘淳于雖郡別而竟連也栢五
年傳稱淳于公如曹度其國危遂不復六年春寔來雖知其國
必滅不知何國取之襄二十九年晉帥諸侯城杞昭元年祁午
數趙文子之功云城淳于是知淳于卽杞國之都也僖十四年
諸侯城緣陵而遷杞不知從何而遷故云淳于公亡國疑似并
之而遷居其地僖十四年又從淳于而遷於緣陵襄二十九年

又從緣陵而遷於淳于以無明文疑不敢質故云推尋事跡似當然也若然淳于為杞所并定似不虛而遷都淳于未有事跡自雍丘而遷緣陵亦可知矣而杜必言遷都淳于又從淳于遷緣陵者以桓六年淳于公亡國襄二十九年又杞都淳于則淳于始末是杞之所有又杞之所都故疑未都緣陵之前亦都淳于也

桓公二年

杞武公四十二年庚午

秋七月杞侯來朝九月入杞

左傳杞侯來朝不敬杞侯歸乃謀伐之九月入杞

程子曰凡杞稱侯者皆當為紀杞爵非侯文誤也及紀侯大去

其國之後杞不復稱侯矣

真是大儒之見詳後國篇紀條

靖公武公子在位二十三年

元戊寅

共公靖公子在位八年

元辛丑

惠公共公子在位十年

元巳酉

史記世家曰共公八年卒子德公立德公十八年卒

春秋莊公二十五年

杞惠公四壬子

夏九月伯姬歸于杞二十七年

癸丑春

公會杞伯姬于洮冬杞伯姬來杞伯來朝

何氏曰杞先代子孫也方東樓公始封與微子啓無異得郊祭

而用天子禮樂入春秋已失公爵降而曰侯後或稱伯或稱子

都無定限足知其微弱僻陋

張氏曰杞國小力微故降爵以自儕於小國杞之自侯而伯自

伯而子蓋浸以微弱也

汪氏曰桓公之經三書杞侯公穀皆作紀此書杞伯以後並書

列國諸系 卷之三
伯惟僖二十三年書杞子卒二十七年書杞子來朝襄二十九
年書杞子來盟文定據左士謂杞用夷禮故貶稱子朱子又謂
杞國最小所以文獻不足徵初稱侯已而稱伯已而稱子蓋其
朝覲貢賦之屬率以子男之禮從事聖人因其實而書之然春
秋未嘗書杞公亦不可考姑闕疑以俟知者

廬陵李氏曰杞奴姓公爵夏禹之裔也武王克殷求禹後得東
樓公而封之九世至成公見春秋自桓以來本稱侯爵後爲時
王所黜故莊二十七年來朝稱伯成公用夷禮故僖二十三年
貶稱杞子卒二十七年來朝稱杞子至文十二年成四年十八
年來朝復稱伯襄二十九年來盟復貶稱子此左氏杜氏之言
也若如公羊之言則凡桓公篇稱杞侯者皆作紀而杞則王者

之後本稱公但春秋黜杞而伯之後之稱子者以微弱爲徐晉
所脅而貶之也胡氏於杞子卒下云杜預謂杞實稱伯而書子
者成公始行夷禮終其身故仲尼貶之則胡氏意亦以爲杞本
伯爵故於此條下無注矣然胡氏本不信時王黜陟之說則是
棄杜預之前說而用杜預之後說也切嘗考之周封三恪獨微
子以三仁之賢得以統承先王修其禮物故其命之曰庸建爾
于上公尹茲東夏杞雖王者之後然東樓本無大功德豈遽錫
以公侯之上爵乎入春秋之始莒以微國尚伐杞而取其邑則
杞之微乎微可知已不待夫子之時而文獻不足也是故論三
恪之實則宋以微子之賢作賓王家陳以武王之賴其利器用
妻以元女故宋爵公而陳爵侯杞之爲侯本無所據但胡略氏

而不言註公羊者拘於王者之後稱公注左氏者泥於桓公編
杞侯之誤爲是紛紛耳

春秋僖公五年

杞惠十年
八丙寅

春杞伯姬來朝其子

臨川吳氏曰曹伯有疾遣其世子射姑代父朝魯春秋譏之杞
惠公疑亦有疾伯姬以其子爲魯之甥故挾之至魯就令攝父
行朝禮是年杞惠公卒成公嗣位蓋伯姬豫欲托其子於魯也
杞伯失君道失父道失夫道伯姬失妻道失母道其子失子道
而魯僖受其朝皆非禮也

成公惠公子在位十八年

元丁卯

史記索隱曰世本云惠公生成公及桓公史記世家以惠公爲德
公脫成公一代云德公卒桓公立非也且成公又見春秋經傳故
左氏莊二十五年云杞成公娶魯女有婚姻之好至僖二十二年
卒始赴而書左傳云成公也未同盟故不書名是杞有成公必矣
又世本云惠公十八年成公十八年

春秋僖公十四年

杞成公
九乙亥

春諸侯城緣陵

胡傳淮夷病杞諸侯會于鹹城緣陵而遷杞焉則其事專矣故
前日後凡直書諸侯而不序也

呂氏曰衛已滅而諸侯城楚兵以封衛故不曰城衛而曰城楚
丘杞未遷而諸侯城緣陵以存杞故不曰城杞而曰城緣陵以
諸侯而封諸侯非王法也故但曰諸侯而不序其功不足錄者
矣

春秋僖公二十三年

杞成十年
八甲申

冬十一月杞子卒

左傳杞成公卒書曰子杞夷也不書名未同盟也凡諸侯同盟死則赴以名赴以名則亦書之不然則否辟不敏也

程子曰杞二王後而伯爵疑前世黜之也中間從夷故子之後復稱伯

胡傳按左氏杞成公卒書曰子杞夷也杜預以謂杞實稱伯而書曰子者成公始行夷禮終其身故仲尼於其卒以文貶之此說是也或曰信斯言是春秋黜陟諸侯爵次以見褒貶不亂名實乎曰春秋固天子之事也而尤謹於華夷之辨中國之所以為中國以禮義也一失則為夷狄再失則為禽獸人類滅矣魯桓篡弑滕首朝之貶而稱子治其黨也夷不亂華成公變之貶而稱子存諸夏也

海陵胡氏曰杞本侯爵或稱伯或稱子稱伯者雜夷禮降二等稱子者純夷禮降二等魯人因其來朝而賤之仲尼修經而貶之亦猶吳楚之君不書葬之例也杞非侯爵程子之論至當貶義諸說皆精

桓公姑容成公子在位七十年 元乙酉

春秋僖公二十七年 杞桓公四戊子 春杞子來朝秋八月乙巳公子遂帥

師入杞

左傳春杞桓公來朝用夷禮故曰子公卑杞杞不共也秋入杞責無禮也

杜氏曰杞先代之後迫於東夷風俗雜壞言語衣服有時而夷然異於介葛盧故惟貶其爵

高氏曰杞魯乃甥舅之國伯姬在焉而凌暴之如此魯人不義

其矣僖公之德衰矣

三十一年杞桓公八壬辰冬杞伯姬來求婦

春秋文公十二年杞桓公二丙午春杞伯來朝二月庚子子叔姬卒

不來朝始朝公也且請絕叔姬而無絕昏公許之

宣公十八年杞桓公四十六庚午春公伐杞

成公五年杞桓公五十一乙亥春正月杞叔姬來歸

臨川吳氏曰僖三十一年杞伯姬為其子求婦而僖公以次女

叔姬與之歸為杞桓公夫人至今四十四年夫婦年皆六十之

上而姬始被出而歸疑是叔姬無子杞桓別有妾子為太子叔

姬心不自安而願歸魯故叔姬既卒而杞桓復來迎其喪以歸

也

庀言曰文十二年杞伯請絕叔姬而無絕昏叔姬遂卒此復書

杞叔姬來歸者蓋杞伯復求其次而文公許之至是亦三十年

矣

冬十二月己丑公會晉侯齊侯宋公衛侯曹伯邾子杞伯同盟于蟲牢

庀言曰經書杞伯與諸侯會盟始此自後凡二見

八年冬十月杞叔姬卒九年春正月杞伯來逆叔姬之喪以歸

十八年杞伯秋杞伯來朝

左傳秋杞桓公來朝勞公且問晉故公以晉君語之杞伯于是

驟朝于晉而請為昏

襄公六年杞桓公七甲午春三月壬午杞伯姑容卒秋葬杞桓公

左傳春杞桓公卒始赴以名同盟故也

厄言曰杞桓公在位七十年享國最久始與魯為昏終以魯君之言而請昏於晉蓋亦能修其政治而不失事大之禮者此所以能與諸侯之會盟不受諸侯之侵伐而春秋於此詳錄其事無異於大國也

孝公句桓公子在位十七年凡十一與諸侯之會盟 元戊申

文公益姑孝公弟在位十四年 元乙丑

春秋襄公二十九年 杞文公六丁巳夏五月仲孫羯會晉荀盈 及諸侯城

杞杞子來盟

穀梁傳古者天子封諸侯其地足以容其民其民足以滿城以自守也杞危而不能自守故諸侯之大夫相帥以城之此變之正也

左傳晉平公杞出也故知悼子合諸侯之大夫城杞晉侯使馬女叔侯來治杞田弗盡歸也晉悼夫人愠曰齊也取貨先君若有知也不尚取之公告叔侯叔侯曰虞虢焦滑霍楊韓魏皆姬姓也晉是以大若非侵小將何以取武獻以下兼國多矣誰得治之杞夏餘也而即東夷魯周公之後也而睦於晉以杞封魯猶可而何有焉魯之於晉也職貢不乏玩好時至如是可矣何必瘠魯以肥杞且先君而有知也毋寧夫人而焉用老臣也文公來盟書曰子賤之也

陳氏曰凡來盟皆大夫也杞伯親之故賤之也杞雖稱子矣前乎此夷儀之會稱伯後乎此卒復稱伯來盟特稱子見春秋之貶諸侯也

平公郁釐

史記名鬱

在位十八年

元丙寅

悼公成平公弟在位十二年

元甲申

隱公元

史記名

悼公子立七月弟過弑之

僖公過隱公弟弑隱公自立在位十九年

元丙申

閔公維僖公子在位十六年弟閔路弑之

元乙卯

哀公

譙周云

閔路閔公弟在位十年

元辛巳

出公軟閔公子在位十二年

元辛卯

簡公春出公子立一年楚惠王之四十四年丙申滅杞

右杞始東樓公終簡公凡十九世六百七十八年

太史公曰杞微甚不足數也楚惠王滅杞其後越王句踐興

蘇氏古史曰杞宋皆天子之事守也禮樂車服在焉孔子言夏殷

禮杞宋不足徵也宋雖不足徵然晉楚大國有所不知未嘗不

焉如杞遂至用夷無足言者昔孔子學官名於郟子郟子至微矣

而其先王之遺文於諸侯為詳孔子之於夏禮蓋由考於杞歟而

無君子不能自列悲夫

李氏洪曰春秋之法中國而夷狄者夷狄之所以辨內外正名實

也吳以泰伯之後或貶而稱國楚以熊繹之後或黜而書州晉武

穆也而或挈晉鄭厲昭也而或挈鄭凡以狄之爾杞先代之後而

即東夷豈非東周所甚貶歟然攷之經杞之書于者二侯者三人

者五伯者二十八筆削褒貶若無一定之法何也以爲時王之所

予奪歟則是征伐禮樂猶出於天子而不爲東周矣以爲因魯史

之舊歟則是進退賞罰無假於聖人而傳習者無所是正矣聖人

之且進且紕豈無意耶觀杞之為國偏於莒困於夷自桓公以前獨與魯好孝公以後始從晉役亦諺所謂蕞爾國也當春秋之季微之小邾猶能誦成王之雅夷之為邾尚能言少昊之官宋先王之後賓祭之禮未至遽亡魯周公之子易象春秋卓有可見杞亦先代之嗣者舊典章抑嘗有一二足徵者乎左氏曰杞用夷禮蓋其習夷久矣春秋不貶之則即夷也不可以不貶遽絕之則為夏之後不忍絕也故書侯書伯書子書人因其善惡而著之

陳世章

陳胡公滿者虞帝舜之後也媯姓

史記世家曰昔舜為庶人堯妻之二女居於媯汭其後因為氏姓姓媯氏舜已崩傳禹天下而舜子商均為封國夏后之時或失或續至於周武王克殷紂乃復求舜後得媯滿封之於陳以奉帝舜祀是為胡公

孔氏左傳正義曰案世本帝舜姚姓哀元年傳稱虞思妻少康以二姚是自舜以下猶姓姚也昭八年傳曰及胡公不淫故周賜之姓始姓媯耳史記以為胡公之前已姓媯非也

左傳鄭子產曰昔虞闕父為周陶正以服事我先王我先王賴其利器用也與其神明之後也庸以元女大姬配胡公而封諸陳以備三恪則我周之自出至於今是賴

國語曰肅慎氏之貢楛矢先王以分大姬配虞胡公而封諸

陳

路史曰陳胡公帝舜之裔也舜之支庶國於胡者為歸姓胡公世

不淫至虞闕父為周陶正武王妃其子胡公滿以太姬錫之媯姓
與肅慎之瑤復之于陳大戴禮云禹受命乃邑姚姓于陳則胡公乃繼封也

史記曰胡公卒子申公犀侯立申公卒弟相公臯羊立相公卒立

申公子突是為孝公孝公卒子幽公寧立年表幽公十四年共和元年巳未也

幽公寧孝公子在位二十三年周厲王奔于彘二十三年幽公卒竹書

厲王二十三年庚午陳幽公薨

僖公孝幽公子在位二十六年

武公靈僖公子在位十五年卒是歲周幽王即位

夷公說武公子在位三年竹書幽王四年癸亥陳夷公卒

平公燮夷公第七年周幽王為犬戎所殺周東遷二十三年平公卒

文公圉平公子在位十年

桓公鮑文公子即位二十三年魯隱公元年巳未也二十六年壬戌

夏經書宋公陳侯蔡人衛人代鄭三十八年卒元丁丑

陳佗即五父桓公弟其母蔡女也桓公卒故蔡人為佗殺桓公太

子免而立佗明年蔡人殺佗而立桓公子躍

厲公躍桓公子在位七年元乙亥

史記曰陳桓公三十八年桓公卒桓公弟佗其母蔡女故蔡為佗

殺五父及桓公太子免而立佗是為厲公厲公七年太子免之三

弟長曰躍中曰林少曰杵曰蔡人誘厲公以好女與蔡人共

殺厲公而立躍是為利公利公者桓公子也立五月卒中弟林立

索隱曰左傳桓公五年文公子佗殺桓公太子免而代之經六

年蔡人殺陳佗立桓公子躍為厲公而左傳以厲公名躍佗立

未踰年故無謚又莊二十二年傳云陳厲公蔡出也故蔡人殺五父而立之則佗與五父俱為蔡人所殺其事不異是一人明矣史記既以佗為厲公遂以躍為利公五父為別是大史公錯耳而班固又以厲公為桓公弟又誤也

莊公林厲公弟在位十年 元庚辰

宣公杵臼莊公少弟即位二十一年巳酉殺太子禦寇禦寇素愛厲

公子完完懼禍及巳乃奔齊宣公四十五年卒 元巳丑 終癸酉

穆公欵宣公子在位十六年 元甲戌

共公朔穆公子在位十八年 元庚寅

靈公平國共公子在位十五年 元戊申

史記靈公十五年飲於夏氏夏徵舒弑靈公而自立為陳侯楚莊

王為之伐陳誅徵舒乃迎靈公太子午於晉而立之

成公午靈公子在位三十年 元癸亥

哀公弱成公子在位三十四年 元癸巳

史記哀公病其弟司徒招殺悼太子偃師立哀公嬖妾子留為太

子哀公怒欲誅招招發兵圍守哀公哀公自經殺招卒立留為君

陳君留哀公庶子

史記曰陳司徒招立留為陳君使使赴楚楚靈王聞陳亂乃殺陳

使者使公子棄疾發兵伐陳陳君留奔鄭

春秋昭公八年 丙寅冬十月壬午楚師滅陳

左傳楚公子棄疾帥師滅陳晉侯問於史趙曰陳其遂亡乎對

曰未也公曰何故對曰陳顛頊之族也歲在鶉火是以卒滅陳

將如之今在折木津猶將復由且陳氏得政於齊而後陳卒亡
自幕至於瞽叟無違命舜重之以明德寘德於遂遂世守之及
胡公不淫故周賜之姓使祀虞帝臣聞盛德必百世祀虞之世
數未也繼守將在齊其兆既存矣

昭公九年丁卯夏四月陳災

左傳陳災鄭裨竈曰五年陳將復封封五十二年而遂亡子產
問其故對曰陳水屬也水火妃也而楚所相也今火出而火陳
逐楚而建陳也妃以五成故曰五年歲及鶉火而後陳卒亡楚
克有之天之道也故曰五十二年

公羊傳陳已滅矣其言陳火何存陳也曰存陳悌矣曷為存陳
滅人之國執人之罪人殺人之賊葬人之君若是則陳存悌矣

惠公吳哀公孫悼太子偃師子壬申楚平王復立之在位二十四年

史記曰楚靈王使公子棄疾伐陳滅之而以棄疾為陳公後五歲
棄疾弒靈王而代立為平王乃求陳悼太子之子吳立為陳侯是
為惠公惠公立探續哀公卒時年而為元空藉五歲矣二十八年

懷公柳惠公子在位四年吳人召之懷公如吳吳人留之因卒吳陳

立閔公元丙申

閔公周

史記各越

懷公子在位二十四年楚惠王殺閔公遂滅陳


元庚子終癸亥

右陳始胡公終閔公凡十九世二十二君他留不在其數共六百餘年

太史公曰舜之德可謂至矣禪位于夏而後世血食者歷三代及
楚滅陳而因常得政於齊卒為建國百世不絕苗裔茲茲有土者
不乏焉

黃氏曰陳舜之後國於荆河之地實邇強楚而遠齊晉其堅於事楚非得已故聖人不忍貶絕而十二公悉著于冊

古刺台月人務問公其本



閔公周

谷城

史記 閔公卒於位二十

四年

立閔公

申

災鄭裨龜曰五年陳將復

鄭公咻惠公于其位四年吳人召之鄭公收吳人留之曰平公

為惠公惠公立蘇轍疾公卒却平而為元空蘇正熾

棄燕赫靈王而外立為平王也宋刺軒太子之子吳立

史記曰焚靈王鄭公于棄燕外刺赫之而以棄燕為刺公

惠公吳蘇公將軒太子鄭裨于士曰焚平王鄭立史并立二十四年

